

**PEMBERITAHUAN PERTANYAAN LISAN DEWAN RAKYAT**  
**MESYUARAT PERTAMA, PENGGAL KEDUA**  
**PARLIMEN KEEMPAT BELAS**

**PERTANYAAN : JAWAB LISAN**  
**DARIPADA : DATIN PADUKA DR. TAN YEE KEW**  
**[ WANGSA MAJU ]**  
**TARIKH : 20 MAC 2019 (RABU)**

**SOALAN NO. 33**

**Datin Paduka Dr. Tan Yee Kew [ Wangsa Maju ]** minta **MENTERI PEMBANGUNAN WANITA, KELUARGA DAN MASYARAKAT** menyatakan proses semakan kepada pusat jagaan kanak-kanak dan TASKA bagi mencegah kes penderaan seksual kanak-kanak.

**JAWAPAN**

Tuan Yang di-Pertua,

Kementerian melalui Jabatan Kebajikan Masyarakat Malaysia (JKM) telah diberi tanggungjawab menguatkuasakan Akta Pusat Jagaan 1993 [*Akta 506*] serta Peraturan-Peraturan Pusat Jagaan 1994 dan Akta Taman Asuhan Kanak-Kanak (TASKA) [*Akta 308*] serta Peraturan-Peraturan Taman Asuhan Kanak-Kanak 2012. Setiap pengendali Pusat Jagaan dan pengusaha TASKA hendaklah mematuhi keperluan dan kehendak yang dinyatakan dalam akta dan peraturan yang telah ditetapkan.

Bagi memastikan tahap penyampaian perkhidmatan Pusat Jagaan / TASKA diurus dengan sempurna, Kementerian melalui JKJ juga menjalankan pemantauan ke atas Pusat Jagaan/TASKA.

Antara bentuk pemantauan yang dijalankan adalah:

1. Menjalankan aktiviti pengesanan ke atas Pusat Jagaan/TASKA yang tidak berdaftar dan memberi peringatan supaya berdaftar dengan JKJ;
2. Menjalankan pemeriksaan berkala dan pemeriksaan mengejut ke premis Pusat Jagaan/TASKA berdaftar oleh Pegawai Diberi Kuasa (PDBK); dan
3. Mengambil tindakan penguatkuasaan di bawah peruntukan Akta Pusat Jagaan 1994 [*Akta 506*] dan Akta Taman Asuhan Kanak-Kanak [*Akta 308*] seperti Arahan Bertulis, Penutupan Sementara, Batal Pendaftaran, Lak, Kompaun dan menjalankan pendakwaan di Mahkamah.

Dari Januari hingga Disember 2018, JKJ telah menjalankan sebanyak **1869** pemeriksaan berkala dan mengejut ke atas Pusat Jagaan. Manakala, sebanyak **1681** pemeriksaan berkala telah dijalankan oleh Pegawai Diberi Kuasa TASKA.

Sebanyak **261** tindakan penguatkuasaan telah diambil terhadap Pusat Jagaan di bawah Akta 506 dari tahun 2015 sehingga Disember 2018. Bagi tempoh yang sama juga, sebanyak **525** tindakan penguatkuasaan telah

### SOALAN NO. 33

diambil terhadap TASKA di bawah Akta Taman Asuhan Kanak-Kanak 1984.

Antara tindakan penguatkuasaan yang telah diambil oleh JKM bagi Pusat Jagaan sama ada berdaftar atau tidak berdaftar adalah mengeluarkan Arahan Bertulis kepada 90 buah Pusat Jagaan, tindakan Lak kepada 12 buah Pusat Jagaan, 36 buah Pusat Jagaan dikenakan tindakan Kompaun, 7 buah Pusat Jagaan di Tutup Sementara, 96 buah Pusat Jagaan dibatalkan pendaftaran, dan 20 buah Pusat Jagaan telah didakwa.

Manakala, bagi TASKA sama ada berdaftar atau tidak berdaftar, antara tindakan penguatkuasaan yang telah diambil oleh JKM adalah mengeluarkan Arahan Bertulis kepada 144 buah TASKA, tindakan Lak kepada 26 buah TASKA, 58 buah TASKA dikenakan tindakan Kompaun, 10 buah TASKA di Tutup Sementara, 256 buah TASKA dibatalkan pendaftaran, dan 31 buah TASKA telah didakwa.

Bagi mencegah kes penderaan seksual kanak-kanak di pusat jagaan kanak-kanak dan TASKA Kementerian melalui JKM menjalankan proses semakan dengan melaksanakan pemantauan ke atas TASKA. Di antara bentuk pemantauan yang dijalankan ialah :

- i. Menjalankan aktiviti pengesanan TASKA tidak berdaftar sepanjang masa dan memberi peringatan supaya berdaftar dengan JKM;
- ii. Menjalankan pemeriksaan berkala dan menjejut ke TASKA oleh Pegawai Diberikuasa;
- iii. Mengambil tindakan penguatkuasaan dalam peruntukan Akta TASKA 1984. Bagi TASKA tidak berdaftar tindakan penguatkuasaan yang boleh diambil adalah Lak, Kompaun dan Pendakwaan. Manakala bagi TASKA yang berdaftar tindakan penguatkuasaan yang boleh diambil Arahan Bertulis, Tutup Sementara, Batal Pendaftaran, Lak, Kompaun dan Pendakwaan di Mahkamah;

### SOALAN NO. 33

- iv. Pelaksanaan Pemasangan Kamera Litar Tertutup (CCTV) di TASKA yang berdaftar dengan JKM melalui Surat Pekeliling Ketua Pengarah Kebajikan Masyarakat Malaysia Bil. 1 Tahun 2015; dan
- v. Menyediakan perkhidmatan Talian Kasih 15999 yang membolehkan sebarang aduan penderaan bayi dilaporkan pada bila-bila masa.